

Kes lelaki dituduh miliki syabu disebut lanjut 13 Ogos

MIRI: Mahkamah Majistret di sini, semalam menetapkan 13 Ogos depan untuk sebutan lanjut kes seorang lelaki yang dituduh memiliki dadah berbahaya jenis syabu.

Sementara itu, tertuduh diperintahkan dibebas dengan jaminan RM1,500 bersama seorang penjamin tempatan.

Penetapan tarikh itu dibuat Majistret Zubaidah Sharkawi setelah membenarkan per-

mohonan pegawai pendakwa ASP Mary Ong.

Dalam prosiding kes yang dibuat menerusi aplikasi Zoom semalam, Mary memohon ditetapkan satu tarikh baharu memandangkan laporan kimia berhubung barang kes belum siap dan juga bagi membolehkan kes tersebut disebut lanjut di Mahkamah Majistret Batu Niah.

Sidi Molok, 54, dari Kampung Kayu Kapor, Bekenu,

telah didakwa mengikut Seksyen 12 (2) Akta Dadah Berbahaya (ADB) 1952 dan dihukum di bawah Seksyen 12 (3) akta yang sama.

Mengikut kesalahan ini, tertuduh boleh didenda tidak melebihi RM100,000 atau penjara hingga lima tahun atau kedua-duanya sekali, jika sabit kesalahan.

Berdasarkan pertuduhan kes, tertuduh bukan sebagai seorang yang diberi kuasa di

bawah ADB 1952 telah didakwa memiliki dadah berbahaya jenis Methamphetamine (syabu) seberat 0.19 gram.

Methamphetamine merupakan satu item yang terkandung di dalam Bahagian III Jadual Pertama ADB 1952.

Dia didakwa melakukan kesalahan itu pada jam 12.50 tengah hari, 29 Julai lalu di hadapan sebuah kedai runcit di Jalan Sibuti, Bekenu.